



## 2

**Niining Leksyona Matun-an Mo Kini**

**Ang Kasal didto sa Cana**

**Miadto Si Jesus Sa Templo**

**Nasayud Si Jesus sa Tanang Tawo**

**ANG KASAL DIDTO SA CANA****(Basaha ang Juan 2:1-12)**

Si Jesus ug ang Iyang inahan, ug ang Iyang mga tinun-an mitambong sa usa ka kasal. Sumala sa ilang custombre kaniadto, vino ang idalit sa panahon sa bangkete. Sa wala pa matapus ang maong bangkete, nahurot na ang vino.

Andam kanunay si Jesus motabang sa katawhan. Si Maria nga Iyang inahan mihangyo Kaniya sa paghimo ug paagi nga dili maulawan ang bag-ong magtiayon sa ilang kasal. Nagkinahanglan kini sa gahum sa Dios, usa ka milagro aron pagtagbo sa maong kinahanglan. Walay katungod si Maria sa pagsugo kang Jesus aron maghimo ug milagro. Ang Dios lamang nga Iyang Amahan, mao ang dunay katungod.

Wala maseguro si Jesus kon panahon na ba kadto nga mosugod Siya pagbuhat ug mga milagro, apan gipahibalo Siya sa Dios nga panahon na. Ug mao nga Iyang gihimong vino ang tubig ug nasulbad ang kinahanglan, mahimo sa Anak sa Dios ang bisan unsang butang

**Buhata Kini**

1. Unsa man ang unang milagro ni Jesus?
  - . . . a) Gi-ayo ang usa ka buta.
  - . . . b) Gihimo Niyang vino ang tubig.
  - . . . c) Gi-ayo Niya ang usa ka sanlahon.

## MIADTO SI JESUS SA TEMPLO

(Basaha ang Juan 2:13-22)

Matag tuig ang katawhan sa Dios miadto sa Templo sa Jerusalem aron pagsaulog sa Pasko sa mga Judeo. Niining higayona maghalad silag mga nating karnero agig paghandom sa hitabo didto sa Ehipto sa milabay'ng mga katuigan diin dihay manulonda sa kamatayon nga milabay sa tibook nasud. Nagtudlo ang Dios sa Iyang katawhan sa ilang pagabuhaton. Ang matag panimalay nag-ihaw ug nating karnero ug ang dugo niini gibutang nila sa pultahan. Ang manulonda sa kamatayon milabay lamang sa ilang mga balay apan sa mga balay sa dili mga taga-Israel ang mga panganay nga anak nangamatay.



Usa kini ka hulagway sa paagi nga himoon ni Jesus, ang Cordero sa Dios, sa pagluwas sa katawhan gikan sa silot nga walay katapusan. Ang pagsaulog sa Pasko sa mga Judeo maoy usa ka mahinungdanon nga matang sa pag-simba sa Dios.

Ang matag usa unta sa mga katawhan magmatinahuron ug magmasimbahon diha sa balay sa Dios. Apan inay ingon niini, diha hinuoy mga magbabaligya nga nanaghimog salawayong buhat. Giabog sila ni Jesus tungod kay ilang gihimong patigayon ang relihiyon.

Midumili si Jesus sa pagbuhat ug milagro aron

lamang pagpakita kon kinsa Siya. Gibuhat Niya ang Iyang mga kahibulongang buhat aron pagtabang sa katawhan. Apan Iyang gisulti ang labing daku nga milagro sa tanan nga magapamatuod nga Siya mao ang Anak sa Dios. Gipakasama ni Jesus ang Iyang lawas ingon nga balay sa Dios tungod kay ang Dios nagapuyo man diha Kaniya. Ang mga katawhan magagunob niini, magapatay sa Iyang lawas sa dili madugay diha sa Jerusalem, apan sa tulo ka adlaw mobangon Siya pag-usab gikan sa lubnganan. Apan ang katawan wala makasabut.

#### Buhata Kini

2. Unsa may gibuhat ni Jesus didto sa templo sa Jerusalem?
  - . . . a) Gi-abog Niya ang mga magbabaligya ug ang mga tigpangilis ug salapi.
  - . . . b) Naghalad Siyag nating karnero.
  - . . . c) Gigun-ob Niya ang templo ug gitukod pag-usab.
3. Unsa nga pagtulon-an ang gitudlo ni Jesus samtang didto Siya sa templo?
  - . . . a) Nga ang templo mao ang dapit sa patigayon.
  - . . . b) Nga Iyang gun-obon ang maong templo ug tukoron pag-usab sa tulo ka adlaw.
  - . . . c) Nga ang Iyang lawas usa ka templo. Magpakamatay Siya ug mobangon gikan sa lubnganan tapos sa tulo ka adlaw.

## NASAYUD SI JESUS SA TANANG TAWO (Basaha ang Juan 2:23-25)

Usa ka hinungdan nganong nagatuon kita niining kursoha mao nga aron makasabut kita kon kinsa gayud si Jesus ug unsay Iyang mabuhat alang kanato. Didto sa Jerusalem daghang mga katawhan mitoo kang Jesus sa dihang nakita nila ang mga milagro nga Iyang gibuhat. Toohan nato ang gitudlo sa Biblia mahitungod kang Jesus.

Daghang mga tawo nga magaingon nga nagatoo sila kang Jesus apan wala sila magapakita niini sa ilang kinabuhi. Kon nagatoo kita nga si Jesus mao ang Pulong, toohan nato ang Iyang gipanulti. Kon nagatoo kita nga ang Iyang kinabuhi mao ang atong kahayag, sundon nato Siya bisan asa kita Niya pagadad-a. Kon nagatoo kita nga Siya mao ang Cordero sa Dios dawaton nato Siya ingon nga halad alang sa atong mga sala.

### Buhata Kini

4. Saguloha ang Juan 2:25.
5. Itandi ang imong mga tubag sa hustong mga tubag nga anaa sa katapusan niining leksyona.
6. Sulati ang blangko sa Rekord sa Estudyante alang sa ika-2 nga leksyon.

## Mga Tubag sa Ika-2 nga Leksyon

Kon duna kay tulo ka hustong mga tubag sulati ug grado nga labing maayo; kon duha ra, sulatig maayo. Kon kubos sa 2 ang imong hustong tubag, basaha pag-usab ang leksyon.

1. b) Gihimo Niyang vino ang tubig.
2. a) Giabog Niya ang mga magbabaligya ug ang mga tigpangilis ug salapi.
3. c) Nga ang Iyang lawas usa ka templo. Magpakamatay Siya ug mobangon gikan sa lubnganan tapos sa tulo ka adlaw.

Gidaghanon sa Hustong mga Tubag \_\_\_\_\_

Grado \_\_\_\_\_